



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu
Tribunál Distritál Suai
Jullu 2019

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Suai

1. Totál kazu ne'ebé JSMP monitoriza: 22

| Tipu kazu | Tipu kazu | Númeru |
|---|---|--------|
| Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika (LKVD) | Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku) | 5 |
| Artigu 154 (KP) | Maus tratus ba kónjuje | 2 |
| Artigu 177 (1) no artigu 182 (a) (KP) | Abuzu seksuál ba ménor ho agravasaun | 3 |
| Abuzu 177 (1) | Abuzu seksuál ba ménor | 3 |
| Artigu 179 (KP) | Abuzu seksuál ba ema ne'ebé labele reziste | 2 |
| Artigu 172 KP | Violasaun seksuál | 1 |
| Artigu 172 (KP) no artigu 23, 24 (KP) | Tentativa violasaun seksuál | 1 |
| Artigu 145 (KP) | Ofensa integridade física simples | 1 |

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
Po Box: 275

Telefone: 3323883 | 77257466

Website : www.jsmp.tl

Casimiro@jsmp.tl

Facebook: www.facebook.com/timorleste.jsmp

Twitter: @JSMPtl

| | | |
|--|--|-----------|
| Artigu 1757, 1761 no 1871 Kodigú Sivíl (KS) | Ezersísiu podér paternál no alimentasaun ba menór | 3 |
| Artigu 140 KP | Omisídiu negligente | 1 |
| Totál | | 22 |

2. Totál desizaun ne'ebé JSMP monitoriza : 16

| Tipu desizaun | Númeru |
|--|-----------|
| Pena prizaun (Artigu 66 KP) | 3 |
| Suspensaun ba prizaun nia ezekusaun (Artigu 68 KP) | 7 |
| Absolve | 2 |
| Omologa | 3 |
| Internamentu | 1 |
| Totál | 16 |

3. Totál kazu sira ne'ebé adia tuir JSMP monitorizasaun : 4

| Razaun adiamentu | Númeru |
|---|----------|
| Arguidu no lezada notifika la marka prezensa maski notifikadu | 3 |
| La prenxe juis koletivu | 1 |
| Totál | 4 |

4. Total kazu sira ne'ebé kontinua prosesu tuir JSMP nia monitorizasaun : 2

B. Deskrisaun sumáriu julgamentu ba desizaun kazu sira

1. Krime maus tratus ba kónjuje

Nú. Prosesu : 0007/16.ANHTU
 Kompozisaun Tribunál : Koletivu
 Juis : Dr. Álvaro Maria Freitas, Dr. Argentino Luísa Nunes no
 Dr. Benjamin Barros
 Prokuradór : Dr. Ricardo Godinho
 Defeza : Dr. Manuel Amaral
 Desizaun : Pena prizaun tinan 2 suspende ba tinan 3

Iha 09 Jullu 2019, Tribunál Distritál Suai prezide julgamentu leitura akordaun ba krime maus tratus ba kónjuje ne'ebé envolve arguidu BCA hasoru nia feen, iha Distritu Ainaro.

Akuzasaun Prokuradór

Prokuradór akuza katak iha 27 Maiu 2016, maizumenus iha tuku 10:00 dadeer, arguidu ho lezada diskute malu kona-ba arguidu nia saláriu ne'ebé arguidu la fó kompletu ba lezada. Ho nune'e, iha tuku 14:00 lokraik, lezada dehan ba arguidu nia inan atu hanorin arguidu atu entrega osan ba lezada. Rona lezada ko'alia hanesan ne'e ba nia inan, arguidu lori besi-kanu ho medida metru ida no baku dala haat iha lezada ninia ulun rezulta kanek no ran sai barak. Bainhira arguidu komete aktu ne'e, lezada ko'us hela sira nia oan ne'ebé foin mak halo fulan rua.

Arguidu mós foti katana atu taa lezada maibé la konsege taa tanba arguidu ninia inan (BdJ) sata-netik no hadau tiha katana ne'e husi arguidu. Arguidu foti fali ai-sanak ida no baku iha lezada ninia kotuk laran. Hafoin ne'e, arguidu foti tan besi-kanu antes, atu baku tan lezada maibé la konsege tanba arguidu ninia inan ho estudante SOLS sira hadau tiha besi-kanu ne'e husi arguidu no haruka lezada atu ba kesar iha polisia. Ho nune'e, lezada ko'us sira ninia oan no ba kesar iha OPS (Ofisiál Polisia Suku) no kontinua ba keixa iha Eskuadra PNTL Hatudu nian. PNTL Hatudu mak tula lezada ho kareta patróliu ba halo tratamentu iha Sentru Saude Hatudu no fila husi ne'ebá lezada ba hela kedas ho ninia inan-aman sira iha Distritu Suai.

Prokuradór akuza arguidu kontra artigu 154 KP kona-ba maus tratus ba kónjuje ho moldura penál tinan 2 to'o tinan 6 prizaun no konjuga ho artigu 2, 3(a), 35(a) no 36 LKVD.

Produsaun ba prova sira

Iha julgamentu, arguidu rekoñese faktu hotu iha akuzasaun no promete sei la baku tan ona lezada maski lezada ho sira nia oan ba hela ona ho lezada nia inan-aman sira iha Suai no hola ona mane seluk.

Aleinde ne'e, lezada mós kontinua konfirma faktu sira iha akuzasaun inklui konfirma mós deklarasaun arguidu nian katak lezada hola ona mane seluk.

Alegasaun finál

Prokuradór konsidera katak arguidu provadu komete krime hasoru lezada bazeia ba deklarasaun lezada no arguidu nian. Prokuradór haktuir tan katak tuir loloos arguidu hanesan la'en tenke proteje lezada sa tan iha momentu arguidu halo agresaun ne'e lezada ko'us hela sira ninia oan bebe ne'ebé foin mak halo fulan rua. Tanba ne'e, husu ba tribunál atu kondena arguidu ho pena prizaun maibé suspende ninia ezekeusaun ba tempu naruk tuir gravidade krime ne'ebé arguidu komete.

Iha parte seluk, defeza husu ba tribunál atu kondena arguidu ho pena ne'ebé adekuaudu tanba arguidu konfesa faktu sira iha akuzasaun no kolabora di'ak ho tribunál. Arguidu mós arrepente ona ninia hahalok no promete la repete iha futuru maski lezada kaben ona ho mane seluk.

Desizaun

Depoide avalia faktu sira ne'ebé prodús durante julgamentu, tribunál prova katak arguidu lori besi kanu ho medida metru ida baku dala haat iha lezada nia ulun no foti katana atu taa lezada maibé la konsege tanba arguidu ninia inan (BdJ) sata-netik no hadau tiha katana ne'e husi

arguidu. Tribunál mós prova arguidu foti ai-sanak baku iha lezada ninia kotuk laran no foti tan besi kanu antes, atu baku tan lezada maibé arguidu ninia inan ho estudante SOLS sira hadau tiha besi kanu ne'e husi arguidu.

Bazeia ba prova sira ne'e no sirkunstánsia sira hotu tribunál konklui prosesu ne'e no kondena arguidu ho pena prizaun tinan rua suspende ba tinan tolu inklui kondena arguidu selu kustu judisiál US\$20.00.

2. Krime abuzu seksuál ba menór ho agravasaun¹

Nú. Prosesu : 0015/15.BBBBV
Kompozisaun Tribunál : Koletivu
Juis : Dr. Alvaro Maria Freitas, Dr. Argentino Luísa Nunes no
Dr. Naason Mário Armindo Marques Doutel
Prokuradór : Dr. Ricardo Godinho
Defeza : Dr. Manuel Amaral
Desizaun : Internamentu tinan tolu

Iha 16 Jullu 2019, Tribunál Distritál Suai prezide julgamentu leitura akordaun ba krime abuzu seksuál ba menór ne'ebé envolve arguidu DN hasoru lezada ho idade menoridade, tinan 7, iha Distritu Bobonaro.

Akuzasaun Prokuradór

Prokuradór akuza katak iha loron la apura maibé iha Novembru 2015, iha lokraik, lezada ho nia alin na'in rua ne'ebé sei ki'ik, ba haris iha mota Tolba-Bobonaro. Bainhira sira fila husi mota no iha dalan klaran arguidu bolu lezada atu hamutuk ho arguidu ba ka'er boek iha mota. Ho nune'e, lezada hamutuk ho arguidu filafali ba mota entretantu lezada nia alin na'in rua fila mesak ba uma. To'o iha mota arguidu kolu hotu ninia rounpa no hamutuk ho lezada kaer boek. Depoide ka'er boek, arguidu kontinua hariis enkuantu lezada tuur iha fatuk leten hodi haree arguidu hariis.

Bainhira hariis hotu, arguidu hatais ninia rounpa no hakbesik-an ba lezada no haruka lezada hasai nia rounpa hodi halo relasaun seksuál ho arguidu. Maibé lezada lakohi atu kolu nia rounpa. Arguidu nafatin obriga lezada atu kolu ninia rounpa no lezada nafatin rekuza. Tanba ne'e, arguidu rasik mak kolu lezada ninia rounpa no haruka lezada toba iha fatuk leten, hafoin arguidu kose ninia orgaun seksuál ba iha lezada ninia orgaun seksuál.

Prokuradór akuza arguidu kontra artigu 177 (2) KP kona-ba abuzu seksuál ba menór ho moldura penál tinan 5 to'o tinan 20 prizaun no kontra artigu 182 (1a) KP kona-ba agravasaun tanba lezada nia idade menus husi tinan 12.

Desizaun

Depoide avalia faktu sira hotu, tribunál prova katak iha mota arguidu haruka lezada hasai nia rounpa hodi halo relasaun seksuál ho arguidu. Maibé lezada lakohi atu kolu nia rounpa. Arguidu nafatin obriga lezada atu kolu ninia rounpa maibé lezada nafatin lakohi. Tanba ne'e, arguidu rasik

¹ JSMP la monitoriza julgamentu produsaun ba prova no alegasaun finál

mak kolu lezada ninia roupa no haruka lezada toba iha fatuk leten, hafoin arguidu kose ninia orgaun seksuál ba iha lezada ninia orgaun seksuál.

Tribunál prova katak liutiha loron rua lezada konta tuir akontesimentu ne'e ba iha ninia inan. Hafoin lezada ninia inan-aman ba husu tuir arguidu no arguidu rekoñese ninia hahalok. Kazu ne'e rezolve ona tuir kustume timór nian no arguidu ninia familia fó ona osan US\$50.00 ba lezada ninia família no promete sei fó tan fahi ida no tais ba família lezada nian.

Tribunál mós prova katak arguidu sofre moras polio desde ki'ik no tuir doutor katak ema ne'ebé moras polio nia sei la hatene saida mak akontese inklui la hatene liafuan diak ka at. Kondisaun arguidu nian ne'e, tribunál bazeia ba depoimentu husi testemuña nu'udar arguidu nia aman no doutor ne'ebé durante ne'e halo tratamentu ba arguidu. Doutor ne'e mós rekomenda atu arguidu tenke kontinua halo tratamentu hodi rekoopera ninia moras.

Bazeia ba artigu 21 KP kona-ba anomalia psíkika no artigu 93 KP kona-ba presupostu atu halo tratamentu ba arguidu ho adekua, tribunál decide internamentu ba arguidu iha Tibar durante tinan tolu no absolve arguidu hosi indemnizasaun sivíl hanesan tais no fahi ne'ebé arguidu promete ona atu fó ba lezada no nia família.

3. Kazu sivíl ezersísiu podér paternál no alimentasaun ba menór

Nú. Prosesu : 0020/18.CVTDS
Kompozisaun Tribunál : Singulár
Juis : Dra. Florencia Freitas
Prokuradór : Dr. Ricardo Godinho (representa menór)
Defeza : Dr. Albino de Jesus Pereira (advogado provadu)
Desizaun : Omologa dezisténsia keixa

Iha 18 Jullu 2019, Tribunál Distritál Suai prezide julgamentu tentativa konsiliaun ba kazu ezersísiu podér paternál no alimentasaun ba menór ne'ebé envolve rekerente MdJ hasoru rekeridu CdS ho rekerida GdO nu'udar rekerente nia inan ho aman, iha Distritu Same.

Petisaun inisiál

Petisaun ne'e bazeia ba artigu 1757 to'o 1762 no 1782 Kodigu Sivíl (KS) kona-ba ezersísiu podér paternál no artigu 1804 to'o 1805 KS kona-ba alimentasaun ba ménor.

Iha julgamentu tentativa konsiliaun ne'e, parte sira halo akordu ba iha asuntu alimentasaun ba menór, hela fatin ba menór no rejime vizita nian.

Rekeridu CdS konkorda iha loron 01 ka 05 kada fulan sei entrega osan ho montante US\$25.00 ba menór atravez rekerida GdO hanesan menór nia inan ne'ebé osan ne'e sei entrega iha uma. Aleinde ne'e, rekeridu konkorda fó mós fos karon ida no mina litru 5 kada fulan.

Kona-ba hela fatin no vizita nian, parte rua konkorda menór sei hela ho rekerida sira nia inan no iha tempu fin de semana, rekeridu sei foti menór ba halimar no toba iha rekeridu ninia uma no sei lori fila iha loron segunda. Enkuantu, tempu feriadu sei fahe tempu tuir durasaun loron ferias nian.

Alegasaun finál

Prokuradór representa menór husu ba tribunál atu omologa akordu ne'ebé rekeridu no rekerida konkorda hamutuk ona. Nune'e mós defeza husu ba tribunál atu omologa akordu ne'e.

Desizaun

Bazeia ba parte rua nia akordu kona-ba alimentasaun, hela fatin no rejime vizita, tribunál konklui prosesu ne'e no omologa akordu ne'e.

4. Krime ofensa ba integridade fízika simples ho natureza violénsia doméstika

Nú. Prosesu : 0051/15.ANANV
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Napoleão Soares da Silva
Defeza : Dr. Fransisco Caetano Martins
Desizaun : Pena prizaun fulan 3 suspende ba tinan 1

Iha 19 Jullu 2019, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida FdC hasoru nia la'en, iha Distritu Ainaro.

Akuzasaun Prokuradór

Prokuradór akuza katak iha 21 Setembru 2015, maizumenus iha oras tuku 08:00 dadeer, arguidu ho lezada diskute malu kona-ba atu lori sira nia oan ne'ebé kabun moras ba ka'er iha nia avo. Iha diskute malu ne'e, lezadu basa dala ida iha arguida ninia hasan no lori ai-kakeu sanak baku dala tolu iha arguida ninia ain kabun parte ain loos. Tanba ne'e, arguida ba foti katana iha dapur laran no ba taa kedas lezadu iha reen-toos dala ida rezulta ran sai barak. Lezadu halo tratamentu iha Sentru Saude Ainaro.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Arguida rekoñese faktu hotu iha akuzasaun no deklarata katak arrepende nia hahalok. Arguida konsiente katak taa nia la'en nu'udar hahalok krime. Arguida mós deklarata katak sira diak malu ona, promete sei la repete tan hahalok hanesan hasoru lezadu iha futuru no arguida mak kontinua halo tratamentu ba lezadu ninia kanek.

Nune'e mós lezadu kontinua konfirma faktu sira iha akuzasaun no deklarata katak sira di'ak malu ona. Lezadu mós konfirma katak arguida mak kontinua halo tratamentu ba ninia kanek.

Alegasaun finál

Prokuradór konsidera arguida nia hahalok ne'e prenze duni elementu sira hosi krime ofensa ba integridade fízika simples bazeia ba arguida nia deklarasaun no lezadu nia konfirmasaun. Tanba ne'e, husu ba tribunál atu kondena arguida ho pena prizaun suspende nia ezekusaun ba tempu naruk.

Defeza konsidera arguida konfesa faktu sira hotu iha akuzasaun, arrepende ona ninia hahalok no dame malu ona ho lezadu. Arguida mós promete ona katak sei la repete tan hahalok hanesan iha futuru hasoru lezadu. Aleinde ne'e, arguida rasik mak kontinua halo tratamentu ba lezadu ninia kanek. Tanba ne'e, husu ba tribunál atu aplika pena ne'ebé adekuadu ba arguida.

Desizaun

Depoide avalia faktu hotu, tribunál prova katak arguida lori duni katana taa dala ida iha lezadu ninia reen-toos rezulta kanek no ran sai barak. Tribunál mós prova katak antes arguida komete krime ne'e, lezadu basa uluk arguida no lori ai-kakeu sanak baku iha arguida ninia ain kabun. Bazeia ba prova sira ne'e, tribunál konklui no kondena arguida ho pena prizaun fulan tolu suspende ba tinan ida.

5. Krime ofensa ba integridade fízika simples ho natureza violénsia doméstika

Nú. Prosesu : 0051/16.ANANV
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Napoleão Soares da Silva
Defeza : Dr. Fransisco Caetano Martins
Desizaun : Pena prizaun fulan 5 suspende ba tinan 1

Iha 24 Jullu 2019, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdA hasoru nia feen, iha Distritu Ainaro.

Akuzasaun Prokuradór

Prokuradór akuza katak iha 18 Novembru 2016, iha lokraik, lezada husu osan atu hola nesesidade ba sira nia oan maibé arguidu foti fali ai-sunu ida no baku baku dala haat iha lezada nia kotuk laran. Hafoin, arguidu tebe dala rua iha lezada nia kabun. Aktu sira ne'e, halo lezada sente tauk no trauma nune'e lezada ba hato'o kedas keixa iha Eskuadru Polísia Ainaro. Kazu ne'e aneksa mós ho relatóriu médiku husi Sentru Saude Ainaro.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu uza direitu nonook. Maski nune'e lezada kontinua konfirma hotu faktu sira iha akuzasaun katak arguidu uza ai baku dala haat iha lezada nia kotuk laran no tebe dala haat iha parte kabun. Lezada hatutan katak sira di'ak malu ona to'o agora.

Alegasaun finál

Prokuradór konsidera arguidu provadu komete krime hasoru lezada bazeia ba lezada nia deklarasaun hanesan ema ne'ebé mak sofre husi violénsia. Tanba ne'e, maski arguidu no lezada diak malu ona no la baku ona lezada, maibé atu halo prevensaun ba arguidu atu la repete tan ninia hahalok hanesan ne'e iha futuru, husu ba tribunál atu kondena arguidu tuir pena ne'ebé hakerek iha artigu 145 KP.

Entretantu, defeza husu ba tribunál atu aplika pena ne'ebé adekuadu tanba arguidu no lezada diak malu ona no arguidu la baku ona lezada.

Desizaun

Depoisde avalia faktu provadu sira ne'ebé prodús durante julgamentu, tribunál prova katak arguidu komete duni krime tuir faktu sira iha akuzasaun hanesan uza ai-sunu baku lezada dala haat iha kotuk laran no tebe dala rua iha lezada ninia kabun. Bazeia ba faktu provadu sira ne'e no sirkunstánsia atenuante no agravante sira, tribunál kondena arguidu ho pena prizaun fulan lima suspende ba tinan ida.

6. Krime ofensa ba integridade fízika simples ho natureza violénsia doméstika

Nú. Prosesu : 0004/15.CVFT
Kompozisaun Tribunál : Singulár
Juis : Dra. Florencia Freitas
Prokuradór : Dr. Ricardo Godinho
Defeza : Dr. Nerio da Costa Xavier (advogadu privadu)
Desizaun : Pena prizaun fulan 6 suspende ba tinan 1

Iha 24 Jullu 2019, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida JB hasoru nia oan (JM), iha Distritu Suai.

Akuzasaun Prokuradór

Prokuradór akuza katak iha 14 Abril 2015, maizumenus iha oras tuku 22:00 kalan, arguida buka nia osan US\$40.00 ne'ebé nia sikat iha livru ida no tau tiha iha kaixa laran. Tanba buka la hetan, arguida hakbesik-an ba lezadu ne'ebé toba hela iha veranda no kaer iha lezadu nia ain hodi fanun lezadu. Bainhira arguida fanun lezadu ne'e, halo lezadu hakfodak no lori ain tebe kedas arguida ninia hasan sorin loos halo arguida monu no sadere ba iha didin loloon. Arguida la simu ho lezadu ninia hahalok no ba foti katana nia knuuk no baku dala ida iha lezadu ninia kotuk laran rezulta kanek no ran sai barak. Lezadu ba halo tratamentu iha Sentru Saude Fatululik. Kazu ne'e aneksa mós ho relatóriu médiku no fotografia husi Polísa-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Arguida konfesa integralmente ba faktu hotu iha akuzasaun, arrepende ninia hahalok no foin primeiravés halo krime. Arguida konsiente katak uza katana nia knuuk baku ema ne'e nu'udar hahalok ne'ebé la diak. Arguida mós deklara katak hanesan inan kontinua halo tratamentu ba lezadu nia kanek no tau matan ba lezadu no lezadu nia alin sira dezde arguida ninia la'en mate.

Entretantu lezadu kontinua konfirma faktu sira iha akuzasaun no deklara katak lezadu husu ona deskulpa ba arguida nu'udar nia inan. Aleinde ne'e, lezadu reforsa deklarasaun arguida nian katak arguida mak tau matan ba lezadu no ninia alin sira dezde nia aman mate.

Alegasaun finál

Prokuradór konsidera arguida halo duni agresaun hasoru lezadu. Mezmu arguida arrepende ona ninia hahalok no foin primeiravés mai hatan iha tribunál, maibé atu halo prevensaun ba futuru nune'e arguida la halo tan krime hanesan hasoru lezadu, husu ba tribunál atu kondena arguida ho pena prizaun maibé suspende ninia ezekusaun.

Entretantu defeza konsidera sirkunstánsia atenuante sira hanesan arguida konfesa faktu sira iha akuzasaun, arguida mós arrepende ona nia hahalok, foin primeiravés mai iha tribunál no arguida mesak mak tau matan ba lezadu ho nia alin sira. Tanba ne'e, husu ba tribunál atu aplika pena ne'ebé adekuada ba arguida.

Desizaun

Depoizde avalia faktu hotu, tribunál prova katak arguida lori katana nia knuuk baku lezadu nia kotuk laran rezulta kanek no ran. Bazeia ba faktu provadu ne'e, tribunál konklui prosesu ne'e no kondena arguida ho pena prizaun fulan neen suspende ba tinan ida.

7. Krime maus tratus ba kónjuje

Nú. Prosesu : 0024/15.BBBLB
Kompozisaun Tribunál : Koletivu
Juis : Dr. Álvaro Maria Freitas Dr. Argentino Luísa Nunes
Dr. Benjamin Barros
Prokuradór : Dr. Ricardo Godinho
Defeza : Dr. Fransisco Caitano Martins
Desizaun : Pena prizaun tinan 3 suspende ba tinan 5

Iha 24 Jullu 2019, Tribunál Distritál Suai prezide julgamentu leitura akordaun ba krime maus tratus ba kónjuje ne'ebé envolve arguidu MAM hasoru nia feen, iha Distritu Bobonaro.

Akuzasaun Prokuradór

Prokuradór akuza katak iha 26 Novembru 2015, maizumenus iha oras tuku 10:00 dadeer, arguidu fila ba uma ho kondisaun lanu no hakilar bolu lezada ho liafuan mal atu lezada lori etu ba arguidu. Rona arguidu hakilar husu etu ne'e, lezada mós suru tiha etu no ba tau iha meja velador leten. Hafoin lezada bolu arguidu atu han etu ne'e maibé arguidu mai no fakar tiha etu ne'e inklui baku rahun bikan iha velador leten. Tanba tauk, lezada halai tiha ba uma kotuk maibé arguidu duni tuir lezada no buti lezada ninia kakorok dala rua. Hafoin ne'e, lezada halai tiha ba iha ai-laran Mautura no aproveita tiha hein sira nia karau.

Iha oras tuku 16:00 lokraik, arguidu ka'er ho katana ida ba tuir lezada iha Mautura. To'o iha ne'ebá arguidu hatete ba lezada katak lezada ba iha ai-laran ne'e atu buka mane seluk hodi halo relasaun seksuál. Maibé lezada hatan katak nia halai ba ai-laran ne'e tanba lakohi diskute malu ho arguidu. Rona lezada koa'lia hanesan ne'e, arguidu tuku dala ida iha lezada nia inus rezulta kanek no ran sai barak.

Antes ne'e, iha loron ne'ebé la apura maibé iha Novembru 2015, iha dadeer, arguidu no lezada diskute malu kona-ba fetosan umane no arguidu tuku dala rua iha lezada nia matan sorik karuk

rezulta bubu no metan. Aleinde ne'e, iha Juñu 2015, arguidu deskonfia lezada amante ho mane seluk no basa dala rua iha lezada ninia hasan sorin karuk ho loos rezulta bubu no moras.

Prokuradór akuza arguidu kontra artigu 154 KP kona-ba maus tratus ba kónjuje ho moldura penál tinan 2 to'o tinan 6 no konjuga ho artigu 2, 3(a), 35(a) no 36 LKVD.

Produsaun ba prova sira

Iha julgamentu, arguidu konfesa parsialmente ba faktu sira iha akuzasaun no deklara katak nia la lanu no la buti lezada nia kakorok. Entretantu arguidu rekoñese fakar etu, riba bikan ba rai no koa'lia liafuan mal ba lezada. Arguidu mós rekoñese katak nia tuku duni lezada nia inus iha ai-laran maibé arguidu rekuza lori katana. Kona-ba faktu tuku lezada bainhira diskute malu kona-ba fetosan umane, arguidu deklara katak nia la tuku maibé basa dala ida iha lezada ninia hasan sorin loos. Arguidu mós hatutan katak arrepende ninia hahalok, promete sei la repete ninia hahalok ne'e iha futuro no durante ne'e arguidu mak sustenta lezada ho sira nia oan na'in haat.

Entretantu lezada kontinua konfirma faktu sira iha akuzausan no deklara katak kuandu arguidu lanu, arguidu sempre baku lezada no trata at lezada. Maibé depoisde kazu ida ne'e, to'o agora arguidu la baku ona lezada.

Alegasaun finál

Prokuradór konsidera katak arguidu provadu komete krime hasoru lezada bazeia ba lezada nia konfirmasaun ba faktu sira iha akuzasaun. Prokuradór mós haktuir katak tuir loloos arguidu hanesan la'en tenke proteje lezada nu'udar feen no inan husi sira nia oan. Tanba ne'e, husu ba tribunál atu kondena arguidu ho pena prizaun maibé suspende ba tempu naruk.

Iha parte seluk, defeza husu ba tribunál atu kondena arguidu ho pena ne'ebé adekuaudu tanba arguidu konfesa faktu balu iha akuzasaun, arrepende ona ninia hahalok, kolabora diak ho tribunál no promete katak sei la repete tan hahalok hanesan iha futuro. Arguidu iha oan na'in haat, diak malu ona ho lezada, arguidu mak responsavel ba família no sei iha tempu ba arguidu atu hadia-an.

Desizaun

Depoisde avalia faktu sira ne'ebé prodús durante julgamentu, tribunál prova katak arguidu halo duni agresaun hasoru lezada tuir faktu sira iha akuzasaun, mezmú arguidu nega faktu balu maibé lezada kontinua reforsa faktu sira iha akuzasaun. Bazeia ba faktu provadu sira inklui tetu mós ba sirkunstánsia argravante no atenuante relevante sira hotu, tribunál kondena arguidu ho pena prizaun tinan tolu suspende ba tinan lima.

8. Krime abuzu seksuál ba menór

| | |
|----------------------|---|
| Nú. Prosesu | : 0003/18.ANHTU |
| Kompozisaun Tribunál | : Koletivu |
| Juis | : Dr. Samuel da Costa Pacheco, Dra. Florencia Freitas no Dr. Naason Mário Armindo Marques Doutel |
| Prokuradór | : Dr. Ricardo Godinho |
| Defeza | : Dr. Francisco Caetano Martins |
| Desizaun | : Pena prizaun tinan 15 |

Iha 24 Jullu 2019, Tribunál Distritál Suai prezide julgamentu leitura akordaun ba krime abuzu seksuál ba menór ho agravasaun ne'ebé envolve arguidu AdC hasoru lezada menoridade, idade tinan 13 fulan 9, iha Distritu Ainaro.

Akuzasaun Prokuradór

Prokuradór akuza katak arguidu no lezada iha relasaun namora no iha 30 Agostu 2017, arguidu kontaktu lezada no haruka lezada ba hasoru arguidu iha mota Aiasa. Iha ne'ebá, arguidu no lezada halo relasaun seksuál. Tuir mai, iha 01 Setembru 2017, maizumenus iha oras tuku 08:00 dadeer, nafatin iha mota Aiasa, arguidu no lezada halo relasaun seksuál ba dala segundu. Iha 05 Setembru 2017, maizumenus iha oras tuku 12:00 meiodia, iha fatin hanesan, arguidu no lezada halo tan relasaun seksuál ba dala tolu. Tuir mai, iha 07 Setembru 2017, maizumenus iha oras tuku 10:00 dadeer, arguidu ho lezada halo tan relasaun seksual ba dala haat iha fatin hanesan. Iha 10 Setembru 2019, iha oras ne'ebé la apura, nafatin iha mota Aiasa, arguidu no lezada halo tan relasaun seksuál ba dala lima (relasaun ikus).

Liutiha ne'e, iha lora ne'ebé la apura maibé iha Novembru 2017, lezada ninia inan diskonfia ona lezada grávida. Ho nune'e, lezada nia inan husu ba lezada kona-ba lezada nia *menstruasaun* no lezada hatan ba nia inan katak nia *mensturasaun* la mai ona fulan tolu. Aleinde ne'e, lezada mós deklara ba nia inan katak arguidu mak fó oan ba nia. Rona ne'e, lezada nia inan ba ható'o kedas keixa iha polisia.

Prokuradór akuza arguidu kontra artigu 177 KP kona-ba abuzu seksuál ba menór ho moldura penál tinan 5 to'o tinan 20 prizaun.

Produsaun ba prova sira

Iha julgamentu, arguidu hili direitu nonook. Entretantu lezada kontinua konfirma faktu sira iha akuzasaun no deklara katak sira koñese malu liuhusi telemovel no arguidu sempre kontaktu lezada hodi husu atu halo relasaun seksuál to'o lezada grávida.

Alegasaun finál

Prokuradór konsidera katak maski arguidu hili direitu nonook maibé arguidu provadu komete krime hasoru lezada bazeia ba lezada nia konfirmasaun ba faktu sira. Tanba ne'e, husu ba tribunál atu aplika pena ba kada krime ne'ebé arguidu halo no akumulá pena hirak ne'e no aplika tuir gravidade krime.

Entretantu, defeza husu ba tribunál atu kondena arguidu ho pena ne'ebé adekuaudu ho konsiderasaun katak relasaun seksuál akontese ho konsentimentu tanba arguidu no lezada iha relasaun namora.

Desizaun

Depoide avalia faktu sira hotu, tribunál prova katak arguidu halo duni relasaun seksuál dala lima ho lezada ne'ebé ho idade menoridade, tinan 13 fulan 9 (sertidaun batismu), iha mota Aiasa. Tribunál prova katak arguidu no lezada iha relasaun namora no koñese malu liuhosi telefone. Bazeia ba prova sira ne'e, tribunál kondena arguidu ba kada krime ho pena tinan 6 prizaun no husi pena hirak ne'e tribunál akumulá hamutuk no kondena arguidu ho pena prizaun tinan 15.

9. Kazu sivil ezersísiu podér paternál no alimentasaun ba menór

Nú. Prosesu : 0009/19.CVTDS
Kompozisaun Tribunál : Singulár
Juis : Dr. Naason Mário Armindo Marques Doutel
Prokuradór : Dr. Napoleão Soares da Silva (representante menór)
Defeza : Dr. Sergio Lobo (advogadu privadu)
Desizaun : Omologa dezisténsia keixa

Iha 24 Jullu 2019, Tribunál Distritál Suai prezide julgamentu tentativa konsiliaun ba kazu ezersísiu podér paternál no alimentasaun ba menór ne'ebé envolve rekerente MdS ho idade tinan 18, AdS ho idade tinan 14 no EdS ho idade tinan 11 hasoru rekeridu FRdS no rekerida FdS hanesan inan no aman, iha Distritu Suai.

Petisaun inisial

Rekeridu FRdS no rekerida FdS nu'udar feen-la'en hahuu iha fulan Juñu 2000 no iha oan na'in tolu. Maibé desde tinan 2010 to'ogora rekeridu la sustenta ona nia oan sira. Durante rekeridu abandona nia oan sira ne'e, menór AdS hela ho rekerida nia bin, SA. Entretantu menór rua seluk, MdS no EdS hela hamutuk ho rekerida ninia bin, AA.

Rekeridu FRdS nu'udar xefe laboratóriu iha ospital ida iha Dili ho saláriu mensal US\$590.00 ne'ebé iha posibilidade atu sustensa nia oan sira.

Rekeridu sira la entende kona-ba ezersísiu podér paternal menór sira espesialmente kona-ba guarda, alimentu sira no rejime ba vizita nian nune'e prezisa hetan intervensaun judisiál atu hametin rejime korespondente nian.

Kazu ezersísiu podér paternál ne'e bazeia ba artigu 1757 to'ogora 1782 KS kona-ba ezersísiu podér paternal no artigu 1804 to'ogora 1805 KS kona-ba alimentasaun ba ménor.

Produsaun prova sira

Iha julgamentu, rekeridu liuhusi ninia advogadu konkorda kada fulan fó alimentasaun ba nia oan sira ho montante US\$125.00 hahuu husi fulan Jullu 2019 no bainhira to'ogora iha fulan Janeiru 2020, rekeridu sei hasae osan ba US\$150.00 kada fulan. Osan ne'e, sei transfere liuhusi MdS nia konta bankaria. Relasiona ho vizita menór sira, parte rua konkorda hatutuk atu oan sira vizita rekeridu iha loron feriadu eskola nian no feriadu loron boot.

Alegasaun final

Prokuradór representa menór husu ba tribunál atu omologa akordu ne'e, tanba iha ona konkordansia husu parte rua kona-ba rejime vizita oan sira no alimentasaun ne'ebé sei hahuu iha fulan Jullu 2019. Aleinde ne'e, defeza mós husu ba tribunál atu omologa akordu ne'e.

Desizaun

Bazeia ba akordu ne'ebé parte rua konkorda ona relasiona ho nesesidade menór sira, tribunál konklui no omologa akordu ne'e.

10. Krime violasaun seksuál

Nú. Prosesu : 0019/17.CVZML
Kompozisaun Tribunál : Koletivu
Juis : Dr. Argentino Luísa Nunes, Dr Alvaro Maria Freitas no Dr.
Benjamin Barros
Prokuradór : Dr. Ricardo Godinho
Defeza : Dr. Manuel Amaral
Desizaun : Absolve

Iha 29 Jullu 2019, Tribunál Distritál Suai prezide leitura akordaun ba krime violasaun seksuál ne'ebé envolve arguidu VC (membro PNTL) hasoru lezada AS ho idade tinan 20, iha Distritu Suai.

Akuzasaun Prokuradór

Prokuradór akuza katak iha 30 Jullu 2017, iha oras tuku 09:00 dadeer, arguidu ho motorizada fila hosi Zumalai no para iha lezada ninia uma oin. Arguidu husu lezada nia bin no maun ba lezada no lezada hatan katak nia maun lori nia bin ba serbisu. Tanba lezada nia maun no bin sira laiha uma nune'e arguidu haruka lezada halo kafe ba arguidu. Bainhira lezada tama ba kioske laran hodi *cok* be manas, arguidu mós tama tuir lezada ba iha kioske laran. Iha ne'ebá, arguidu kaer lezada nia liman no dada lezada tama ba iha lezada nia kuartu laran no obriga lezada halo relasaun seksuál. Lezada atu hakilar maibé arguidu ameasa lezada atu la bele hakilar. Aleinde lezada tauk tanba hetan ameasa, lezada mós tauk tanba arguidu rai hela pistola iha kama leten.

Prokuradór akuza arguidu kontra artigu 172 KP kona-ba violasaun seksuál ho moldura penál husi tinan 5 to'o tinan 15.

Produsaun ba prova sira

Iha prosesu julgamentu, arguidu konfesa parsialmente ba faktu sira no deklarata katak nia fila hosi Zumalai no para duni iha lezada ninia uma oin ho intensaun atu husu lezada nia bin ne'ebé nu'udar arguidu nia kolega serbisu (membro PNTL). Maibé tanba lezada hatan katak nia bin laiha, ho nune'e arguidu mós fila kedas ba nia uma. Arguidu nega faktu katak lori pistola, haruka lezada halo kafe no ameasa hodi halo relasaun seksuál.

Aleinde ne'e, lezada mós nega faktu sira iha akuzasaun no deklarata katak iha momentu ne'ebá arguidu no lezada iha relasaun namora durante fulan rua ona. Nune'e bainhira arguidu hapara sira nia relasaun domin, halo lezada la satisfas no hato'o lia bosok ba polisia. Kona-ba rezultadu médiku ne'ebé relata katak iha sinál iha lezada nia hymen, lezada deklarata katak ida ne'e la'os tanba arguidu ninia hahalok maibé rezultadu husi relasaun ne'ebé nia halo ho mane seluk ne'ebé agora nu'udar nia la'en.

Alegasaun final

Prokuradór husu tribunál atu absolve arguidu tanba aleinde arguidu rejeita faktu sira, lezada rasik mós nega faktu hotu iha akuzasaun no deklarata katak faktu sira iha akuzasaun nu'udar lia bosok. Lezada hato'o keixa tanba la satisfas ho arguidu ninia hahalok ne'ebé hapara sira nia domin. Nune'e mós defeza husu ba tribunál atu absolve arguidu tanba faktu sira nu'udar lia bosok no relatóriu médiku ne'ebé apresenta nu'udar relasaun lezada ho mane seluk ne'ebé agora nu'udar nia la'en.

Desizaun

Depoisde avalia faktu sira ne'ebé prodús durante julgamentu, tribunál la prova arguidu no lezada iha relasaun nu'udar namoru, la prova arguidu ameasa no mós la prova arguidu obriga lezada halo relasaun seksuál. Bazeia ba faktu la provadu sira ne'e, tribunál absolve arguidu husi krime ne'e.

11. Krime abuzu seksuál ba ema ne'ebé labele reziste

| | |
|----------------------|---|
| Nú. Prosesu | : 0037/15 PDUA |
| Kompozisaun tribunál | : Koletivu |
| Juis | : Dr. Alvaro Maria Freitas, Dr. Benjamin Barros no Dr. Argentino Luísa Nunes |
| Prokuradór | : Dr. José Elo |
| Defeza | : Dr. Francisco Caetano Moniz |
| Desizaun | : Pena prizaun tinan 14 |

Iha 30 Jullu 2019, Tribunál Distritál Suai prezide julgamentu leitura akordaun ba krime abuzu seksuál ba ema labele reziste ne'ebé envolve arguidu MA hasoru lezada MdJ nu'udar nia kuiñada ho idade tinan 18, iha Distritu Suai.

Akuzasaun Prokuradór

Prokuradór akuza arguidu katak iha loran ne'ebé la apura maibé iha fulan Jullu 2018, arguidu ho nia feen ba vizita nia banin fetu sira durante semana ida. Iha lokraik bainhira lezada atu ba haris fatin, arguidu kaer ho tudik ida tuir lezada ba haris fatin no ameasa lezada atu halo relasaun seksuál ho lezada. Arguidu konsege halo relasaun seksuál ho lezada no depoisde remata arguidu hateten ba lezada katak atu hola mós lezada sai nia feen segundu. Tuir fali, liu tiha loran rua no iha kalan boot, arguidu tama ba iha lezada nia kuartu laran no obriga halo relasaun seksuál ho lezada. Depoisde ne'e, arguidu no nia feen filafali ba sira nia uma.

Iha loran balun tuir mai, arguidu ba filafali iha nia banin sira nia uma no haree katak nia banin laiha uma, nune'e arguidu lori lezada ba iha mota laran no halo tan relasaun seksuál ho lezada. Husi arguidu nia hahalok ne'e, lezada isin rua no hahoris oan mane ida.

Prokuradór akuza arguidu kontra artigu 172 KP kona-ba violasaun seksuál ho moldura penál tinan 5 to'o tinan 15 prizaun.

Produsaun prova sira

Iha julgamentu, arguidu nega faktu sira iha akuzasaun no deklara katak nia ho nia feen ba toba semana ida iha banin boot ninia uma ho intensaun atu husu nia kuiñada boot fó sarani sira nia oan. Arguidu mós deklara katak durante arguidu iha nia banin boot nia uma arguidu nunca hasoru lezada tanba lezada sira nia uma dook husi uma ne'ebé arguidu toba ba. Arguidu hatutan katak nia banin feto mak du'un arguidu kona-ba aktu ne'e tanba la satisfas ho arguidu ne'ebé lori hotu nia oan sira ba hela ho arguidu. Entretantu lezada kontinua konfirma hotu faktu iha akuzasaun prokuradór nian. Entretantu lezada la bele ko'alia no la bele rona tanba moras *epilepsi*.

Alegasaun finál

Prokuradór konsidera katak arguidu provadu komete krime violasaun seksuál dala tolu hasoru lezada ne'ebé moras *epilepsi* (la bele ko'alia no la bele rona) mezmú iha produsaun ba prova arguidu nega halo relasaun seksuál ho lezada. Aleinde ne'e, husi rezultadu teste DNA hatudu katak arguidu mak aman ba lezada ninia oan. Tanba ne'e, bazeia konsiderasaun sira ne'e no sirkuntánsia sira hotu, husu ba tribunál atu kondena arguidu ho pena prizaun tinan 7.

Iha parte seluk, defeza husu ba tribunál atu kondena arguidu ho pena ne'ebé adekuaudu tanba arguidu foin primeiravés mai hatan iha tribunál.

Depoizde alegasaun finál, iha arguidu nia liafuan ikus, arguidu foin konfesa katak halo duni relasaun seksuál ho lezada dala tolu to'o hahoris oan ida. Maibé arguidu rekuza ho tudik ameasa lezada. Arguidu mós deklara katak nia hatene lezada sofre moras hipilepsi.

Desizaun

Depoizde avalia faktu sira hotu, tribunál konsidera lezada nu'udar ema ne'ebé sofre moras epilepsi desde ki'ik. Ho konsiderasaun ne'e tribunál halo alterasaun jurídiku husi artigu 172 KP kona-ba violasaun seksuál ba fali iha artigu 179 KP kona-ba abuzu seksuál ba ema ne'ebé labele reziste.

Tribunál prova katak arguidu halo duni relasaun seksuál ho lezada hamutuk dala tolu to'o lezada hahoris oan mane ida. Tribunál la prova arguidu lori tudik ameasa lezada atu halo relasaun seksuál. Bazeia ba prova no relatóriu ospítal nian kona-ba lezada nia kondisaun, tribunál kondena arguidu ba kada krime ho pena prizaun tinan 8 no husi pena ne'e tribunál akumulá hamutuk ba pena tinan 24 prizaun. Husi pena tinan 24 ne'e tribunál no konklui arguidu ho pena tinan 14 prizaun.

12. Krime tentativa violasaun seksuál

Nú. Prosesu : 0067/14.ANANV
Kompozisaun Tribunál : Koletivu
Juis : Dra. Florencia Freitas, Dr. Naason Mário Armindo Marques
Doutel no Dr. Samuel da Costa Pacheco
Prokuradór : Dr. José Elo
Defeza : Domingos dos Santos (advogada privadu)
Desizaun : Absolve

Iha 31 Jullu 2019, Tribunál Distritál Suai prezide leitura akordaun ba krime tentativa violasaun seksuál ne'ebé envolve arguidu AdC hasoru nia namorada ho idade tinan 17, iha Distritu Ainaro.

Akuzasaun Prokuradór

Prokuradór akuza katak iha 29 Setembru 2014, iha oras tuku 05:00 madrugada, lezada foin fila hosi festa atu ba uma. Bainhira iha dalan klaran, lezada hasoru arguidu ne'ebé hein ona lezada. Arguidu dada lezada tama ba du'ut laran besik eskola nia kotuk. Tanba ne'e, lezada husu ba arguidu atu ba ne'ebé maibé arguidu hatan katak tuir deit inklui tolok lezada.

Iha eskola nia kotuk ne'e, lezada husu tan dala ida ba arguidu atu halo saida no arguidu hatan ba lezada katak atu halo relasaun seksuál ho lezada. Rona arguidu koalia hanesan ne'e, lezada tenta telefone ninia aman maibé arguidu hadau tiha lezada nia telefone ne'e no desliga tiha.

Prokuradór akuza arguidu kontra artigu 172 KP kona-ba violasaun seksuál ho moldura penál husi tinan 5 to'o tinan 15 prizaun no kontra artigu 23 no 24 KP kona-ba tentativa.

Produsaun ba prova sira

Iha prosesu julgamentu, arguidu deklara parsialmente ba faktu sira iha akuzasaun katak nia no lezada iha relasaun namoru maizumenus tinan ida ona no iha momentu ne'ebá arguidu ho lezada fila husi festa no konversa iha dalan klaran. Bainhira konversa hela derrepente motor ida mai no leno sira nune'e arguidu ho lezada halai tiha ba iha eskola kotuk. Arguidu mós deklara katak nia laiha intensaun atu halo relasaun seksuál ho lezada. Tanba ne'e, arguidu rekuza faktu rasta lezada ba eskola kotuk, hadau no desliga lezada nia telefone no mós rekuza katak husu lezada atu halo relasaun seksuál. Arguidu hatutan katak arguidu no lezada konversa desde tuku 05:00 madrugada to'o tuku 11:00 dadeer.

Entretantu lezada konfirma hotu faktu iha akuzasaun no deklara katak nia ho arguidu laiha relasaun namora só koñese malu nu'udar kolega. Iha momentu ne'ebá fila hosi festa lezada atu ba haris iha be-matan ne'ebé besik eskola refere no iha ne'eba arguidu rasta lezada ba eskola kotuk no husu atu halo relasaun seksual ho lezada. Lezada mós konfirma katak sira ko'alia duni desde tuku 05:00 madrugada to'o tuku 11:00 dadeer.

Testemuña AA nu'udar lezada ninia aman deklara katak lezada fila hori festa koremetan no ba kedas haris iha be-matan besik eskola tanba lezada atu ba eskola. Maibé lezada foin fila iha tuku 11:00 dadeer. Ho nune'e, testemuña husu ba lezada tanbasá fila kleur no lezada mós konta saida mak arguidu tenta halo ba nia. Depoide ne'e, testemuña ba kedas iha arguidu ninia uma hodi rezolve problema tuir kultura timor nian maibé laiha solusaun nune'e parte lezada hato'o keixa ba polísia.

Alegasaun final

Prokurador haktuir katak iha produsaun ba prova, arguidu nega faktu sira iha akuzasaun maibe lezada kontinua konfirma faktu sira iha akuzasaun. Tanba ne'e, husu na tribunál atu kondena arguidu tuir konviksaun tribunál nian.

Entretantu defeza husu ba tribunál atu absolve arguidu husi krime ne'e tanba arguidu ninia hahalok la prenze rekeztu sira husi krime tentativa violasaun seksuál. Tuir defeza, se arguidu hakarak halo relasaun seksuál la presiza ko'alia to'o oras neen nia laran.

Desizaun

Depoide avalia faktu sira hotu, tribunál prova katak arguidu ho lezada iha relasaun namora. Tribunál mós prova arguidu no lezada fila hosi festa no iha dalan klaran sira konversa. Bainhira konversa hela, motor ida leno sira nune'e sira deside ba konversa fali iha eskola kotuk. Tribunál la prova arguidu tenta halo relasaun seksuál ho lezada. Tribunál prova katak arguidu ho lezada konversa komesa tuku 05:00 madrugada to'o tuku 11:00 dadeer. Bazeia ba prova sira ne'e tribunál absolve arguidu husi krime ne'e.

13. Krime ofensa ba integridade física simples ho natureza violência doméstica

Nú. Prosesu : 0003/18.ANHTB
Kompozisaun Tribunál : Singulár
Juis : Dr. Argentino Luísa Nunes
Prokurador : Dr. Ricardo Godinho
Defeza : Dr. Francisco Caetano Martins
Desizaun : Pena prizaun fulan 3 suspende ba tinan 1

Iha 31 Julu 2019, Tribunál Distritál Suai prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu SGX hasoru nia feen, iha Distritu Ainaro.

Akuzasaun Prokurador

Prokurador akuza katak iha 19 Feveireiru 2018, iha oras tuku 17:00 lokraik, lezada hamoos hela foer besik besi-kanu bee ne'ebé suli hela. Lezada ninia banin fetu ho banin mane hirus lezada tanba sira hanoin lezada tau ai-kulit aat iha be ne'e. Ho nune'e, lezada ho ninia sira diskute malu. Haree ida ne'e, arguidu foti fatuk ida no tuda kona iha lezada ninia hasan besik matan rezulta kanek no ran sai barak.

Prokurador akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu hili direitu nonook. Entretantu lezada kontinua konfirma hotu faktu sira iha akuzasaun no deklarata katak arguidu foti fatuk tuda ba hudi no fatuk refere haksoit no ba kona fali iha lezada nia hasan besik matan. Lezada ba halo tratamentu iha Ospital Ainaro. Lezada mós deklarata katak sira diak malu ona no to'o agora arguidu la baku tan ona lezada.

Alegasaun finál

Prokuradór husu ba tribunál atu kondena arguidu ho pena prizaun maibé suspende tanba konsidera arguidu nia hahalok ne'e prenze elementu sira hosi krime ofensa ba integridade fízika simples.

Entretantu defeza husu ba tribunál atu aplika pena ne'ebé adekuaudu ba arguidu tanba konsidera arguidu la tuda fatuk direktamente ba lezada. Aleinde ne'e, arguidu no lezada malu ona no arguidu mós la baku tan ona lezada.

Desizaun

Depoide avalia faktu sira hotu, tribunál prova katak arguidu foti fatuk no tuda kona iha hudi nune'e fatuk refere haksoit no kona fali lezada nia hasan besik matan. Tanba ne'e maski la tuda direktamente maibé tanba arguidu ninia hahalok rezulta lezada hetan kanek. Bazeia ba faktu provadu sira ne'e, tribunál konklui no kondena arguidu ho pena prizaun fulan tolu suspende ba tinan ida.

14. Krime ofensa ba integridade fízika simples

Nú. Prosesu : 0028/17.CVMCT
Kompozisaun Tribunál : Singulár
Juis : Dra. Florencia Freitas
Prokuradór : Dr. Ricardo Godinho
Defeza : Dr. Fransisco Caetano Martins
Desizaun : Pena prizaun fulan 5 suspende ba tinan 1

Iha 31 Jullu 2019, Tribunál Distritál Suai, prezide julgamentu leitura sentensa ba krime ofensa ba integridade fízika simples ne'ebé envolve arguidu Abrão Barros hasoru lezada Amélia de Jesus (viziñu), iha Distritu Suai.

Akuzasaun Prokuradór

Prokuradór akuza katak iha 19 Agostu 2017, iha oras tuku 07:20 dadeer, arguidu basa dala ida iha lezada ninia hasan sorin loos, buti lezada ninia kakorok no tuku dala ida iha lezada ninia reen-toos. Aktu sira ne'e, halo lezada lezada sofre kanek, bubu no ran sai barak to'o lezada ninia oin nakukun. Arguidu halo agresaun ne'e tanba lezada seidak selu osan piku ne'ebé foti husi arguidu ho presu US\$30.00.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Iha prosesu julgamentu arguidu hili direitu nonook. Entretantu lezada kontinua konfirma faktu sira iha akuzasaun no deklara katak arguidu basa dala ida iha hasan sorin loos, buti kakorok no tuku dala ida iha reen-toos. Arguidu halo agresaun sira ne'e tanba deit lezada sei debe hela osan piku ho montante US\$ 30.00.

Alegasaun finál

Prokuradór husu ba tribunál atu kondena arguidu ho pena prizaun maibé suspende tanba konsidera arguidu nia hahalok ne'e prenze elementu sira hosi krime ofensa ba integridade fízika simples. Entretantu defeza husu ba tribunál atu kondena arguidu ho pena ne'ebé justu no adekaudu.

Desizaun

Depoide avalia faktu sira hotu, tribunál prova katak arguidu lori liman basa dala ida iha lezada ninia hasan sorin loos, buti lezada ninia kakorok no tuku dala ida iha lezada ninia reen-toos. Bazeia faktu provadu sira ne'e no tetu ba sirkunstánsia sira hotu, tribunál kondena arguidu ho pena prizaun lima suspende ba tinan ida.

15. Krime abuzu seksuál ba menór ho agravasaun

Nú. Prosesu : 0003/19.MFSIC
Kompozisaun Tribunál : Koletivu
Juis : Dr. Samuel da Costa Pacheco, Dra. Florencia Freitas no
Dr. Naason Mário Armindo Marques Doutel
Prokuradór : Dr. Napoleão Soares da Silva
Defeza : Dr. Franssico Caetano Martins
Desizaun : Pena prizaun tinan 14

Iha 31 Jullu 2019, Tribunál Distritál Suai prezide julgamentu leitura akordaun ba krime abuzu seksuál ba menór ho agravasaun ne'ebé envolve arguidu AdC hasoru lezada AdC hanesan ninia feton ho idade tinan 12 fulan 8, iha Distritu Same.

Akuzasaun Prokuradór

Prokuradór akuza katak iha 17 Janeiru 2019, iha oras tuku 14:00 lokraik, lezada fila hosi eskola no haree arguidu tuur mesak hela iha veranda oin. Lezada tama ba uma laran no troka tiha frada eskola nian no kontinua ba han. Depoide han hotul, lezada ninia inan mós to'o uma hosi hili ai nune'e lezada ho ninia inan tuur konversa iha sira nia uma oin.

La kleur arguidu hakbesik-an ba ninia inan no sujere atu sira ba halimar tiha iha sira nia avo nia uma ho distansia maizumenus metro 40. Arguidu nia inan konkorda no lezada la'o uluk ba nia avo sira no nia inan mós tuir lezada.

To'o iha sira nia avo nia uma, lezada nia tian haruka lezada han hamutuk ho nia. Bainhira lezada sei han hela, arguidu bolu lezada no haruka lezada fila ba uma hodi halo modo. Rona arguidu bolu ne'e, lezada nia avo hatan no haruka atu arguidu han hamutuk ho sira. Maibé arguidu nafatin bolu lezada ho lian maka'as.

Tanba arguidu kontinua bolu lezada, lezada sente tauk no hamrik hosi ninia tuur fatin atu fila ba uma. Bainhira haree lezada hamrik atu fila, arguidu mós la'o uluk ba uma. To'o iha uma lezada ba kedas iha dapur laran no husu ba arguidu atu halo modo saida. Arguidu hatan katak halo deit aidila tahan. Maibé tanba aidila tahan laiha nune'e arguidu haruka lezada atu fuga deit etu. Depoide fuga etu, lezada suru etu fuga ne'e no fó ba arguidu.

Bainhira arguidu han hela, arguidu ninia kolega ida mai tanba ne'e arguidu rai tiha nia etu no la'o ba hasoru nia kolega ne'e. Arguidu dehan ba nia kolega ne'e atu toka tiha muzika iha nia kuartu laran no haruka nia kolega ne'e hein iha ne'ebá tanba arguidu sei han.

Depoisde han, arguidu haree lezada tuur hela iha veranda oin. Arguidu kaer tudik ida no bolu lezada ho liafuan ameasa katak "*ó mai deit ona, se hau maka ba fali ó mate deit, ó la bele hakilar lae ó mate deit*". Lezada hakbesik-an ba arguidu no ho lian maka'as arguidu haruka lezada tama tuir arguidu ba iha kuartu laran. Arguidu nafatin kaer tudik no ho lian maka'as haruka lezada kolu nia roupa. Tanba tauk, lezada mós kolu ninia roupa no akontese relasaun seksuál. Akuzasaun ne'e anexa ho relatóriu médiku.

Prokuradór akuza arguidu kontra artigu 177(1) KP kona-ba abuzu seksuál ba menór ho moldura penál tinan 5 to'o tinan 20 prizaun no kontra artigu 182 (1d) KP kona-ba agravausaun.

Produsaun ba prova sira

Iha julgamentu arguidu konfesa katak nia halo duni relasaun seksuál ho lezada tuir faktu sira iha akuzasaun maibé rekuza ameasa lezada no mós rekuza kaer tudik.

Entretantu lezada kontinua konfirma faktu sira iha akuzasaun no deklara katak arguidu kaer duni tudik no bolu lezada ba kuartu laran no halo relasaun seksuál. Lezada mós deklara katak depoisde akontesimentu ne'e, lezada la ba eskola tanba moe no agora dadaun lezada hela iha uma mahon no foin kontinua ninia eskola. Lezada hatutan katak arguidu no lezada inan ida maibé aman mak ketak.

Alegasaun finál

Prokuradór konsidera katak arguidu provadu halo relasaun seksuál ho lezada ne'ebé nu'udar nia feton ho idade tinan 12 fulan 8. Antes ne'e, bainhira seidauk iha desizaun ba medida koasaun, arguidu halai tiha ba Same no liutiha laron tolu mak polisia foin kaptura arguidu. Bazeia ba prova sira ne'e no sirkunstánsia sira hotu, husu ba tribunál atu kondena arguidu ho pena prizaun tinan 18.

Iha parte seluk, defeza husu ba tribunál atu halo alterasaun jurídiku husi artigu 177(1) ba fali iha artigu 177(2) tanba iha relatóriu médiku esplika katak lezada ninia orgaun seksuál la sofre la ran. Tanba ne'e, husu ba tribunál atu kondena ho pena ne'ebé adekuadu.

Desizaun

Depois avalia faktu sira hotu, tribunál katak arguidu halo relasaun seksuál ho lezada ho maneira ameasa ho tudik. Tribunál mós prova katak arguidu ninia hahalok ne'e halo lezada moe no deside lakohi ona atu eskola. Lezada fo'in kontinua eskola fali bainhira lezada hela iha uma mahon. Aleinde ne'e, tribunál mós prova katak arguidu ho lezada hanesan feton-nan. Bazea ba faktu provadu sira ne'e no tetu mós ba sirkunstánsia sira hotu, tribunál konklui prosesu ne'e no kondena arguidu ho pena prizaun tinan 14.

16. Kazu sivil ezersísiu podér paternál no alimentasaun ba menór

Nú. Prosesu

: 0064/18.CVTDS

Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Napoleão Soares da Silva (representa menór)
Defeza : Dr. Albino de Jesus Pereira
Desizaun : Omologa dezisténsia keixa

Iha 31 Jullu 2019, Tribunál Distritál Suai hala'ó julgamentu tentativa konsiliaun ba kazu sivil kona-ba ezersísiu podér paternál no alimentasaun ba menór ne'ebé envolve rekerente MDR hasoru rekeridu NA no rekerida AR nu'udar rekerente nia inan no aman, iha Distritu Suai.

Petisaun inisiál

Iha 25 Maiu 2018, rekeridu NA abandona hela rekerida ho sira nia nia oan. Durante ne'e, menór sira hela hamutuk ho rekerida AR hanesan inan no rekerida AR mak tau matan ba menór sira.

Petisaun ne'e bazeia ba provizaun relevante iha artigu 1757 to'ó 1762 no 1782 KS kona-ba ezersísiu podér paternál no artigu 1804 no 1805 KS kona-ba alimentasaun ba menór.

Produsaun prova sira

Iha julgamentu ne'e, rekeridu no rekerida konkorda atu menór sira hela hamutuk ho rekerida hanesan inan no sei ba iha rekeridu nia uma iha lora sabdu no fila iha domingu. Rekeridu no rekerida mós konkorda atu rekeridu fó alimentasaun ba nia oan sira kada fulan ho montante US\$75.00.

Alegasaun finál ba materia de faktu

Prokuradór representa menór no defeza husu ba tribunál atu omologa akordu ne'e tanba parte rua iha ona konkordansia ba labarik sira nia interese.

Desizaun

Bazeia ba akordu husi parte rua ne'e kona-ba nesesidade menór, tribunál omologa prosesu ne'e.

Atu hetan informasaun kle'an liu tan favor kontaktu:

Casimiro dos Santos

Diretór Interinu JSMP

Diresaun e-mail: santos.cas76@gmail.com | casimiro@jsmp.tl

info@jsmp.tl

Telefone: 3323883 | 77257466